

„Član 37.

(Naknade za rad komisija i druge naknade)

(1) Vlada Kantona svojim aktom utvrđuje način obrazovanja i visinu naknade za rad stručnih komisija koje imenuje Vlada Unsko-sanskog kantona, odnosno rukovodilac kantonalnih organa državne službe, rukovodilac pravosudne institucije i ovlaštenih organa budžetskih korisnika.

(2) Rukovodilac organa može za izuzetne rezultate u radu nagraditi državnog službenika, odnosno namještenika 20% od osnovne plaće, najviše dva puta godišnje.

(3) Državni službenik, odnosno namještenik, koji po nalogu rukovodioca, u izuzetnim ili hitnim slučajevima, obavlja poslove odsutnog državnog službenika, odnosno namještenika, u skladu sa Zakonom o državnoj službi u Unsko-sanskom kantonu („Službeni glasnik Unsko-sanskog kantona“, broj: 4/17, 16/17 i 15/20), ima pravo na naknadu u visini 20% od osnovne plaće radnog mjesta čije poslove privremeno obavlja.

(4) Obavljanje poslova odsutnog državnog službenika, odnosno namještenika, konkretnog radnog mjesta u toku godine ne može trajati duže od tri mjeseca.

(5) Naknada za obavljanje poslova odsutnog državnog službenika, odnosno namještenika, obračunava se i isplaćuje samo za radne dane vršenja poslova. Naknada se neće obračunavati i isplaćivati za vrijeme odsutnosti s posla po osnovu bolovanja ili godišnjeg odmora.

(6) Odsustvom u smislu stava (3) ovog člana smatraju se sva odsustva sa posla izuzev odsustva zbog korištenja godišnjeg odmora i službenih putovanja.

(7) Državnom službeniku kojeg rukovodilac organa uprave/direktor upravne organizacije ovlasti da umjesto njega u vrijeme njegove odsutnosti, koja traje u kontinutetu najmanje pet radnih dana, donosi pojedinačne akte za određena pitanja iz nadležnosti organa, pripada pravo na naknadu za taj rad u visini 20% plaće rukovodioca/direktora, a obračun će se vršiti za radne dane vršenja ovlaštenja.

(8) Državnom službeniku, kojeg nadležni organ ovlasti da do imenovanja ili u odsutnosti rukovodioca/direktora, odnosno sekretara sa posebnim zadatkom obavlja poslove rukovodioca/direktora, sekretara sa posebnim zadatkom, pripada pravo na plaću tog radnog mjesta.“

Član 4.

U slučaju kolizije ovog Zakona i drugih zakona, kojim se uređuju plaće i naknade, primjenjuju se odredbe ovog Zakona.

Član 5.

Ovaj Zakon stupa na snagu osmog dana od dana objavljivanja u „Službenom glasniku Unsko-sanskog kantona“.

Broj: 01/1-2-45-479/25
15. jula 2025. godine
Bihać

Predsjedavajući Skupštine
Unsko-sanskog kantona
Zikrija Duraković

926.

U skladu sa odredbama IV. 2 b) i V.A. 11 b) Ustava Unsko-sanskog kantona - prečišćeni tekst („Službeni glasnik Unsko-sanskog kantona“, br. 1/04 i 11/04), a u vezi sa članom 144. stav (3) Zakona o visokom obrazovanju na području Unsko-sanskog kantona („Službeni glasnik Unsko-sanskog kantona“, broj 26/24), na prijedlog Vlade Unsko-sanskog kantona, na 28. redovnoj sjednici, održanoj dana 15. 7. 2025. godine, Skupština Unsko-sanskog kantona d o n o s i

**ZAKON O IZMJENAMA I DOPUNAMA
ZAKONA O UNIVERZITETU U
BIHAĆU**

Član 1.

U Zakonu o Univerzitetu u Bihaću („Službeni glasnik Unsko-sanskog kantona“, broj: 24/17 – prečišćeni tekst i 25/17) u članu 13. stav (4) tačka f) mijenja se i glasi:

„f) Fakultet zdravstvenih studija Univerziteta u Bihaću.“

Član 2.

U članu 16. stav (2) mijenja se i glasi:

„(2) Upravni odbor Univerziteta ima devet članova i to pet koje imenuje Vlada Unsko-sanskog kantona u javnoj i transparentnoj konkursnoj proceduri i četiri iz reda akademske zajednice koje u javnoj i transparentnoj konkursnoj proceduri imenuje Senat Univerziteta u Bihaću.“

U istom članu u stavu (3) riječ „osnivač“ zamjenjuje se riječima „Vlada Unsko-sanskog kantona“.

Član 3.

Član 18. mijenja se i glasi:

„Član 18.

(Razrješenje člana Upravnog odbora)

(1) Vlada, odnosno Senat mogu razriješiti člana Upravnog odbora kojeg su imenovali i prije isteka mandata u skladu sa ovim Zakonom i Statutom, a posebno iz sljedećih razloga:

- a) na njegov lični zahtjev;
- b) ako utvrdi da je odgovoran za neuspješan ili nezakonit rad Univerziteta;
- c) ukoliko utvrdi da ima lične ili druge interese koji su u suprotnosti sa interesima Univerziteta (sukob interesa);
- d) ako svojim radom povrijedi ugled dužnosti koju obavlja;
- e) ukoliko zbog odsutnosti ili spriječenosti ne obavlja dužnost člana Upravnog odbora u periodu dužem od tri mjeseca i
- f) u drugim slučajevima utvrđenim zakonom, osnivačkim aktom i drugim propisima.

(2) Razrješenje člana Upravnog odbora bliže se uređuje odlukom Vlade o utvrđivanju postupka imenovanja članova upravnog odbora Univerziteta u Bihaću koje imenuje Vlada, odnosno Statutom.“

Član 4.

U članu 19. stav (1) mijenja se i glasi:

„(1) Upravni odbor obavlja poslove utvrđene Zakonom i Statutom, a posebno:

- a) daje mišljenje o Statutu Univerziteta u Bihaću;
- b) donosi pravilnik o unutrašnjoj organizaciji i sistematizaciji radnih mjesta, na prijedlog rektora, po prethodno pribavljenom mišljenju sindikata visokog obrazovanja;
- c) utvrđuje planove finansiranja i razvoja;
- d) donosi godišnji program rada Univerziteta, na prijedlog Senata;
- e) donosi finansijski plan i usvaja godišnji obračun;
- f) usmjerava, kontrolira i ocjenjuje rad rektora u domenu finansijskog poslovanja;

- g) odlučuje o korištenju sredstava preko iznosa utvrđenog Statutom;
- h) odlučuje o prigovoru zaposlenih na odluke tijela Univerziteta koji su u prvom stepenu odlučivali o pravima, obavezama i odgovornostima zaposlenih iz radnog odnosa;
- i) podnosi osnivaču najmanje jedanput godišnje izvještaj o poslovanju Univerziteta;
- j) donosi odluku o formiranju i ukidanju organizacionih jedinica na prijedlog Senata;
- k) daje prethodnu saglasnost na izbor dekana i rektora;
- l) vrši i druge poslove u skladu sa Zakonom i Statutom.“

Član 5.

U članu 21. u stavu (2) riječi: „Zakonom o visokom obrazovanju („Službeni glasnik Unsko-sanskog kantona“, broj: 8/09)“, zamjenjuju se riječima: „Zakonom o visokom obrazovanju na području Unsko-sanskog kantona („Službeni glasnik Unsko-sanskog kantona“, broj 26/24)“.

Član 6.

U članu 22. stav (1) mijenja se i glasi:

„(1) Senat Univerziteta odlučuje o svim akademskim i stručnim pitanjima, a posebno:

- a) odlučuje o pitanjima nastavne, naučne, umjetničke i stručne djelatnosti Univerziteta;
- b) donosi Statut Univerziteta u skladu sa zakonom;
- c) donosi opće akte u skladu sa zakonom i Statutom;
- d) donosi na prijedlog naučno-nastavnog vijeća, odnosno umjetničko-naučno-nastavnog vijeća za studijske programe prvog, drugog, trećeg ciklusa studija, integrisane studijske programe I i II ciklusa, programe cjeloživotnog i neclikličnog obrazovanja, kratkim studijskim programima, ljetne/zimske škole te interdisciplinarne programe;
- e) donosi pravila studiranja;
- f) imenuje članove Upravnog odbora iz reda predstavnika Univerziteta;
- g) bira i razrješava rektora;
- h) objavljuje konkurs za izbor nastavnika i saradnika i vrši izbor akademskog i

- naučno-istraživačkog osoblja na prijedlog nastavno-naučnog i nastavno-umjetničkog vijeća organizacione jedinice;
- i) imenuje komisije u postupku sticanja doktorata nauka;
 - j) usvaja izvještaje u postupku sticanja naučnog zvanja doktora nauka;
 - k) dodjeljuje počasna zvanja profesor emeritus te počasni doktor nauka;
 - l) predlaže Ministarstvu broj studenata za upis u prvu godinu studija svih ciklusa studija;
 - m) donosi Etički kodeks studenata, nastavnog i nenastavnog osoblja;
 - n) daje prijedlog Upravnom odboru za osnivanje i ukidanje fakulteta i drugih organizacionih jedinica na Univerzitetu na osnovu ovog Zakona, Zakona o visokom obrazovanju i Statuta;
 - o) razmatra prijedloge članica o realizaciji studija u saradnji sa drugim visokoškolskim ustanovama koje mogu imati za rezultat izdavanje dvojnih ili zajedničkih diploma.“

Član 7.

U članu 23. u stavu (2) briše se interpunkcijski znak tačka (.) i dodaju riječi koje glase: „koji je u radnom odnosu sa punim radnim vremenom na Univerzitetu.“

Član 8.

Član 26. mijenja se i glasi:

„Član 26.

(Nadležnosti rektora)

Rektor obavlja poslove utvrđene Zakonom o visokom obrazovanju i Statutom, a naročito:

- a) zastupa i predstavlja Univerzitet;
- b) organizira i rukovodi radom Univerziteta i odgovoran je za zakonitost rada;
- c) donosi pojedinačne akte u skladu sa zakonom i Statutom;
- d) predlaže opće akte u skladu sa zakonom i Statutom;
- e) predlaže organima Univerziteta mjere za unapređenje rada;
- f) predlaže Upravnom odboru mjere za efikasno i zakonito obavljanje djelatnosti Univerziteta;

- g) predlaže osnove planova rada i razvoja Univerziteta Upravnom odboru;
- h) predlaže Upravnom odboru pravilnik o radu sa organizacijom i sistematizacijom radnih mjesta u skladu sa zakonom;
- i) imenuje i razrješava prorektore;
- j) izvršava odluke Upravnog odbora i drugih organa Univerziteta;
- k) odlučuje o korištenju sredstava do iznosa utvrđenog Statutom;
- l) odlučuje o pravima, obavezama i odgovornostima radnika iz radnog odnosa;
- m) odlučuje o radnom statusu akademskog osoblja na prijedlog naučno-nastavnog vijeća organizacione jedinice;
- n) podnosi Upravnom odboru izvještaj o finansijskom poslovanju Univerziteta;
- o) izvršava finansijski plan;
- p) učestvuje u radu Rektorske konferencije Bosne i Hercegovine;
- r) obavlja i druge poslove u skladu sa zakonom i Statutom.“

Član 9.

Član 27. mijenja se i glasi:

„Član 27.

(Odgovornost rektora)

- (1) Rektor za svoj rad u domenu akademskih pitanja odgovara Senatu.
- (2) Rektor za svoj rad u domenu poslovanja odgovara Upravnom odboru, u skladu sa odredbama Zakona o visokom obrazovanju koje se odnose na odgovornost za poslovanje visokoškolske ustanove.
- (3) Rektor jednom godišnje podnosi Senatu izvještaj o svom radu u domenu akademskih pitanja početkom akademske godine za prethodnu akademsku godinu, a Upravnom odboru izvještaj o radu i poslovanju početkom kalendarske godine za prethodnu godinu.“

Član 10.

U članu 28. u stavu (2) iza riječi „osnivač“ dodaju se riječi koje glase: „Ministarstvo obrazovanja, nauke, kulture i sporta“ i interpunkcijski znak zarez (,).

Član 11.

Član 30. mijenja se i glasi:

„Član 30.
(Prorektori)

- (1) Rektor u radu pomažu prorektori, koje imenuje i razrješava rektor.
- (2) Broj, uslovi imenovanja i razrješavanja i ovlaštenja prorektora bliže se uređuju Statutom.
- (3) Prorektori ne mogu biti birani ili imenovani u organima izvršne i zakonodavne vlasti, gradskim i općinskim vijećima, u organima političkih stranaka i sindikalnim organizacijama za vrijeme trajanja mandata.
- (4) Prorektori u toku mandata ne mogu vršiti funkciju dekana / direktora ili prodekana organizacione jedinice, kao ni člana Upravnog odbora.“
- (5) Mandat prorektora vezan je za mandat rektora.

Član 12.

Član 32. mijenja se i glasi:

„Član 32.

(Nastavno-naučno vijeće, odnosno nastavno-umjetničko vijeće)

- (1) Stručni organ fakulteta, odnosno umjetničke akademije je nastavno-naučno vijeće, odnosno nastavno-umjetničko vijeće (u daljnjem tekstu: vijeće).
- (2) Vijeće čine svi nastavnici i saradnici koji su sa punim radnim vremenom zaposleni na Univerzitetu i koji učestvuju u naučno-nastavnom procesu organizacione jedinice. U sastavu vijeća mora biti najmanje 15% članova iz reda studenata – predstavnika studenata, sa svih ciklusa studija koji se organiziraju na organizacionoj jedinici.
- (3) Članovi vijeća iz reda studenata biraju se neposredno na organizacionoj jedinici, iz reda najuspješnijih studenata, vodeći računa o ravnomjernoj zastupljenosti svih godina i ciklusa studija.
- (4) Statutom će se propisati način i postupak izbora članova vijeća iz reda studenata.
- (5) Vijeće u okviru svoje nadležnosti:

- a) daje mišljenje i prijedloge Senatu o akademskim, naučnim, umjetničkim i stručnim pitanjima, u skladu sa Statutom;
- b) daje prijedloge Senatu u vezi sa promjenama u strukturi i sadržaju studijskih programa i nastavnim metodama;
- c) daje prijedlog Rektor u vezi sa radnim statusom akademskog osoblja;

- d) bira predstavnika u Senat;
- e) predlaže program razvoja organizacione jedinice;
- f) imenuje komisiju za podnošenje izvještaja za izbor u naučno-nastavno, odnosno umjetničko-nastavno zvanje i utvrđuje prijedlog odluke o izboru kandidata;
- g) imenuje komisije u postupku izrade završnog diplomskog-master rada na drugom ciklusu studija;
- h) odlučuje po žalbama studenata na prvostepene odluke dekana o pojedinačnim pravima studenata;
- i) obavlja i druge poslove u skladu sa Statutom i drugim općim aktima Univerziteta i fakulteta.“

Član 13.

Član 33. mijenja se i glasi:

„Član 33.

(Dekan/direktor)

- (1) Dekan / direktor predstavlja i zastupa organizacionu jedinicu, odgovoran je za zakonitost rada organizacione jedinice te organizira i rukovodi radom na organizacionoj jedinici.
- (2) Dekan u okviru svoje nadležnosti:
 - a) saziva i predsjedava sjednicama vijeća;
 - b) predlaže rektoru unutrašnju organizaciju i sistematizaciju radnih mjesta organizacione jedinice;
 - c) imenuje i razrješava prodekane;
 - d) odlučuje u prvom stepenu o pojedinačnim pravima studenata;
 - e) odlučuje i snosi odgovornost za korištenje sredstava kojima raspolaže organizaciona jedinica u skladu sa općim aktom Univerziteta;
 - f) naredbodavac je za izvršenje finansijskog plana koji se odnosi na organizacionu jedinicu u skladu sa općim aktom Univerziteta;
 - g) odgovoran je za organizaciju nastavnog procesa na organizacionoj jedinici kojom rukovodi;
 - h) odgovoran je za evidenciju prisustva na poslu radnika organizacione jedinice kojom rukovodi;
 - i) provodi odluke Upravnog odbora, Senata, vijeća, rektora te drugih tijela

Univerziteta u skladu sa zakonom i Statutom;

j) obavlja i druge poslove utvrđene Statutom.

(3) Dekan može raspolagati sredstvima organizacione jedinice do iznosa utvrđenog Statutom.“

Član 14.

Član 34. mijenja se i glasi:

„Član 34.

(Izbor dekana/direktora)

(1) Dekana/direktora bira vijeće organizacione jedinice, sa liste kandidata na koju prethodnu saglasnost daje Upravni odbor.

(2) Za dekana može biti izabran nastavnik u naučno-nastavnom zvanju vanrednog ili redovnog profesora, koji je zaposlen sa punim radnim vremenom na Univerzitetu i koji je član vijeća tog fakulteta.

(3) Dekan/direktor se bira na mandat od četiri godine po proceduri javnog konkursa i može biti izabran za dekana ukupno dva mandata računajući od osnivanja Univerziteta.

(4) Dekan ne može biti biran ili imenovan u organima izvršne i zakonodavne vlasti, gradskim i općinskim vijećima, u organima političkih stranaka i sindikalnim organizacijama za vrijeme trajanja mandata.

(5) Ako je pozicija dekana/direktora prije isteka perioda na koji je izabran ostala upražnjena, vijeće iz članova vijeća te organizacione jedinice u naučno-nastavnom zvanju vanrednog ili redovnog profesora imenuje vršioca dužnosti dekana/direktora, uz prethodnu saglasnost Upravnog odbora, koji obavlja dužnost do izbora novog dekana/direktora, a najduže šest mjeseci.

(6) Istovremeno sa imenovanjem vršioca dužnosti dekana/direktora iz stava (5) ovog člana, vijeće će pokrenuti proceduru izbora dekana.

(7) Bliže odredbe o uslovima i postupku izbora dekana/direktora uredit će se Statutom.“

Član 15.

U članu 35. u stavu (2) iza riječi „osnivač“ dodaju se riječi koje glase: „Ministarstvo obrazovanja, nauke, kulture i sporta“ i interpunkcijski znak zarez (,).

Član 16.

Iza člana 51. dodaje se novi član 52. koji glasi:

„Član 52.

(Rok za usaglašavanje Statuta)

Senat Univerziteta u Bihaću je u obavezi u narednih 90 dana od dana stupanja na snagu izmjena i dopuna ovog Zakona, usaglasiti odredbe Statuta Univerziteta u Bihaću sa odredbama izmjena i dopuna ovog Zakona.“

Član 17.

Ovaj Zakon stupa na snagu osmog dana od dana objavljivanja u „Službenom glasniku Unsko-sanskog kantona“.

Broj: 01/1-2-45-480/25
15. jula 2025. godine
Bihać

Predsjedavajući Skupštine
Unsko-sanskog kantona
Zikrija Duraković

927.

U skladu sa odredbama IV.2 b) i V.A.11 b) Ustava Unsko-sanskog kantona - prečišćeni tekst („Službeni glasnik Unsko-sanskog kantona“, br. 1/04 i 11/04), a u vezi sa članom 122. Zakona o visokom obrazovanju na području Unsko-sanskog kantona („Službeni glasnik Unsko-sanskog kantona“, broj 26/24), na prijedlog Vlade Unsko-sanskog kantona, na 28. redovnoj sjednici, održanoj dana 15. 7. 2025. godine, Skupština Unsko-sanskog kantona d o n o s i

ZAKON O IZMJENAMA I DOPUNAMA ZAKONA O STUDENTSKOM STANDARDU

Član 1.

U Zakonu o studentskom standardu („Službeni glasnik Unsko-sanskog kantona“, broj 8/18) u članu 6. stav (6) mijenja se i glasi:

„(6) Ministar donosi pravilnik kojim propisuje postupak i kriterije za izbor smještajnih kapaciteta iz stava (5) ovog člana.“

Član 2.

U članu 7. u stavu (1) na početku rečenice, dodaju se riječi: „U ustanovi studentskog standarda“ i interpunkcijski znak zarez.

U istom članu stav (4) mijenja se i glasi:

„(4) U mjestima u kojima ne postoji ustanova studentskog standarda, poslove ishrane studenata Ministarstvo može povjeriti registrovanim subjektima ugostiteljske djelatnosti.“